

Objavljeni konkursi za najviša slobodna sudijska i tužilačka mjesta

Visoko sudsko i tužilačko vijeće Bosne i Hercegovine, Visoko sudsko i tužilačko vijeće Federacije Bosne i Hercegovine i Visoki sudski i tužilački savjet Republike Srpske počinje sa objavljivanjem konkursa za najviša sudijska i tužilačka mjesta na nivou Bosne i Hercegovine i entiteta.

Visoka sudska i tužilačka vijeća, u skladu sa svojim zakonskim nadležnostima, objavit će javni konkurs za imenovanja na mjesta sudija i tužilaca u Sud Bosne i Hercegovine, Tužilaštvo Bosne i Hercegovine, Vrhovni sud Federacije BiH, Tužilaštvo Federacije BiH, Ustavni sud Republike Srpske, Vrhovni sud Republike Srpske i Javno tužilaštvo Republike Srpske.

Ukupno, u prvom krugu objavljivanja konkursa maksimalno se objavljuje 106 mjesta. U određivanju tačnog broja mjesta u ovim sudovima, Visoka sudska i tužilačka vijeća će koristiti preporuke Nezavisne pravosudne komisije – plan za reorganizaciju sudova u BiH. U slijedećih nekoliko mjeseci objavit će se konkursi za druga sudijska i tužilačka mjesta.

Nezavisna pravosudna komisija (IJC) je završila distribuciju prijavnog materijala koji će podnosioci prijava na sudijska i tužilačka mjesta koristiti u postupku ponovljenog odabira sudija i tužilaca. Ovaj prijavni materijal će pružiti Visokim sudskim i tužilačkim vijećima sveobuhvatne informacije o svakom kandidatu. Obrasci su standardizirani kako bi se omogućila potpuna transparentnost u postupku imenovanja.

Raspodjela materijala u cijeloj zemlji završena je u petak, 16. avgusta. Prijavni materijali su dostupni na slijedećim mjestima:

- Glavni ured Visokog sudskog i tužilačkog vijeća, Emerika Bluma 8, u Sarajevu;
- Ministarstvo civilnih poslova i komunikacija Bosne i Hercegovine;
- Sud Bosne i Hercegovine;
- Ministarstva pravde u Republici Srpskoj, Federaciji BiH i sva kantonalna ministarstva pravde;
- Ustavni sud i Vrhovni sud Republike Srpske;
- Vrhovni sud Federacije BiH;
- Svi okružni sudovi i tužilaštva u Republici Srpskoj;
- Svi kantonalni sudovi i tužilaštva u Federaciji BiH;
- Apelacioni i osnovni sudovi u Brčko Distriktu.

Materijali će također biti dostupni na web stranici IJC-a na: www.ohr.int/ijc

Ovaj prijavni materijal predstavlja osnovu za pravičan, transparentan i nezavisan proces odabira sudija i tužilaca, što je ključni preduslov za uspostavljanje profesionalnog, nezavisnog i nepristrasnog pravosuđa u Bosni i Hercegovini.

Za više informacija, molimo obratite se Saneli Tunović, službeniku za odnose sa javnošću Nezavisne pravosudne komisije na tel. 061-131-785 ili 033/445-216 lokal 205.